

Sèn Nicolò stravardene da le aghe

Chest an la sagra de Poza é stata dedicada ai Studafech e don Andrea à benedì le aghe recordan la devozion veiora de la jent al sènt patron che à salvà l paisc da l'agajon

Devozion e festa - Sèn Nicolò l'è l Sènt più benvolù dai bec e l'è l Sènt che deida fora i più purec e deboi descheche, aldò de la storia (o lejenda) l'ha fat con le trei touse che era destinade a fenir su la strada, ge dajan na dota percheche le posse se maridar.

Chest Sèn l'è ence l patron de Poza, e en jebia ai 6 de dezbember l'è stat n gust veder la geja piena de scoles e de bec, che i à empieni i benc, ma i se à dat jù de tropes ence desche servidores, ciantores e letores.

Chest an, proprio per defener i più picoi e timorousc, Sèn Nicolò à tegnù i Krampus dalonc dal tendon e l ge à descomanà ence de star dedant geja a spetar che i scoles vegne fora da messa. Ampò i bec i à podù ben segur jir a "sciampar dai diaoi" da sera, e ence le sere dant: na tradizion amò viva e fona te paisc, a chela che, con ardiment o con tricola, béleche nesciugn vel renunziar. Na tradizion che ampò, desche dute le tradizion, col temp la muda, tant che se taca a veder stroz ence Krampus auc n metro e n scioldo...

Dant de la part più deribolenta, desche per ogni sagra, l'è stat la part religiosa. Dò la defilada con la Musega da Poza, le autorità, i preves e i conscric (i prumes del nef milené) da Piazz de Sèn Nicolò fin te geja grana, endana la messa don Andrea à recordà che i evenc de chest uton, e ence la letura del di, i ne met su l'avertida che duc cognon rencurar l creà, l'ambient e dut chel che aon dintorn, e se cruziar ence de le persone, chele vejine e chele menco vejine, su le pedie de Sèn Nicolò, che l'è n gran Sèn apontin percheche l varda al ben di autres con solidarietà.

Apede chest don Andrea l se à recordà che Sèn Nicolò, per la jent da Poza, l'è ence l Sènt che stravarda da le aghe. L'è storia, no lejenda: chi de età amò se recorda - zachei met dant ence l'an: l 1905 - de chela outa che l ruf de Ruacia l'era dò a jir per sora, e la jent che era te la picola geja de Sèn Nicolò sa Meida l'aea na gran tema, ma l preve l'ha uzà sù l Santiscim contra chel'aga manaciouosa, che desche per miracol l'ha desvià so cors, sparagnan geja e jent. Fosc apontin da enlouta l ruf vegn chiamà "de Sèn Nicolò".

Coscita chest an don Andrea l'ha



La geja de Poza se à empieni de bec per la messa de la sagra, a chela che à tout part Sèn Nicolò en persona.



Chest an la festa te tendon é stata dedicata ai Studafech.



Da Sèn Nicolò no pel mencià i conscric: chest an chi del 2000, i prumes del nef milené.



Dò messa duc é jic en procescion con la statua del Sèn e l Santiscim.



Per intercescion de Sèn Nicolò, che ne stravarda da le aghe, l'è stat benedì l ruf de Poza.

volù renovar la devozion a Sèn Nicolò che ne stravarda da le aghe. Dò messa l'è jic en procescion con la statua del Sèn, don Christopher col Santiscim, i servidores, l Cor de geja, la Musega da Poza, l ombolt e le autorità del Comun e la jent, enscin al ruf. I é jic fin tedò l tendon, olache jà chejea la polenta per la marena de la sagra, e alò sul picol pont don Andrea l'ha endò uzà l Santiscim envers l ruf, per grazia ades no manaciouosa, e l'ha benedì le aghe con l'intercescion de Sèn Nicolò. N segn fort de devozion che la comunanza à aprijà n muie.

La sagra é jita inant con la part più aiegra e da spas del tendon, ma nience chiò no l'è stat desmentià deldut l deajster ambiental de la fin de otober, e nience i obietives de solidarietà che, su le pedie de Sèn Nicolò, i caraterisea ogni an la sagra de Poza. La marena enjignada dai Alpìns, l spetàcol de

Circensema, l marendel de Bambi, la loteria de Sèn Nicolò, la "conta de le borele" per l Perù, l Conzert de la Musega de Poza e en ùltima la cena per i voluntadives de la Festa ta Mont e la musega da bal de la Spritz Band: dut à abù n fin de solidarietà e de condivijon co la comunanza. Chest an l devalpai più gran e i vadagnes de la festa ge é stac sporc ai Studafech, rengrazié con le bele parole de l ombolt de Sèn Jan Giulio Florian, che à chiamà sun paladina l'ispetor de Fascia Giancarlo Pederiva, i comandanc de Poza e de Vich Andrea Winterle e Franco Pellegrin e l President de la Festa ta Mont Roberto Bertacco. L gran batiman de duta la jent à palesà la recognoscenza e l benvoler de duc per chisc voluntadives, co la speranza che, ensem a Sèn Nicolò, i seghite a ne stravardar da le aghe.

Lucia Gross